

Tun Mahathir saman Najib, kerajaan

SINAR HARIAN

20 DISEMBER 2017

WARTAWAN SINAR HARIAN

SHAH ALAM - Bekas Perdana Menteri, Tun Dr Mahathir Mohamad memfailkan saman pemula bagi memohon deklarasasi bahawa laporan Suruhanjaya Siasatan Diraja (RCI) mengenai kerugian pertukaran asing pada tahun 1990-an adalah tidak sah.

Beliau menamakan semua enam ahli RCI iaitu Tan Sri Mohd Sidek Hassan, Datuk Wira Kamaludin Md Said, Datuk Seri Tajuddin Atan, Tan Sri Saw Choon Boon, K Pushpanathan dan Datuk Yusof Ismail bersama Perdana Menteri Datuk Seri Najib Tun Razak, Kabinet dan kerajaan sebagai defendan.

Tindakan saman pemula itu diambil berikutan laporan RCI yang dikeluarkan sebelum ini didakwa tidak sah di bawah Akta Suruhanjaya Siasatan 1950.

Saman yang difailkan melalui peguam, Haniff Khatri Abdulla di Mahkamah Kuala Lumpur itu membangkitkan mengenai bahan dan lampiran yang didakwa tidak dimasukkan di dalam laporan RCI berkenaan.

Selain itu, Mahathir turut membangkitkan mengenai laporan akhir RCI tersebut yang tiada hujah bertulis daripada 25 saksi terlibat.

Malah, transkrip soalan dan sesi jawapan antara panel RCI, pegawai bertugas, peguam pemerhati dan saksi turut tiada dalam laporan tersebut.

Di samping itu, saman pemula berkenaan turut menyatakan bahawa keseluruhan prosiding RCI perlu disediakan secara transkrip atau rakaman video.

Mahathir dalam surat tuntutan pada 4 Disember lalu mendakwa bahawa laporan setebal 495 muka surat itu tidak memasukkan transkrip semua saksi, hujahan dan bukti.

**© 2017 All Rights Reserved •Karangkraf Group Media • © 2017 Hakcipta
Terpelihara • Kumpulan Media Karangkraf**

Source: <http://www.sinarharian.com.my/semasa/tun-mahathir-saman-najib-kerajaan-1.772508>